

Сунъгъгин, бичгин залгълдана кӧдлмшиг ясрулхми

Социалистическ залгълдана кӧдлмш олн-ӧмтнӧ эдл-ахун ӧслтд цань уга эрки тӧр. Олн-ӧмтнӧ керг-уулд, госу-дарственн аппаратин кӧдлмшд, экономическ болн мана орн-нутгин харслгъна кӱчиг бат-лхд, коммунистическ ӧргӧ тосхлгънд таслвр уга, эрки-айта сунъгъг, бичгин залгълдан ик чинртӧ кӧдлмш.

Тууджлгч XX хургин ши-дврмӱд кӱцӧдж, Алдр Октя-брин 40-ч джилин ӧбниг кӱ-цӧнъгъустӧгъяр тосхин кергт, мана танъгъчин сунъгъг, бич-гин залгълдана кӧдлмшчнр соцдӧрлдӧнд орлцад, сӧн дии-лвртӧ йовцхана.

Кӧдлмшиннь аациг ясрулсн учрар 1957 джилин хойрдгч кварталин госу-дарственн зу-ра 111,3 процент кӱцӧгдв. ГТС-н телефонистка В. Ф. Вагина, МТС-н телефонистка Н. П. Шепаква—эдн ӧмтиг сӧн кӧдлмшӧрч тӱдмдж уга-гъар тетгнӧ, ЛГУ хӧлӧдг П. А. Патерикин, Ф.К. Позд-ний—эдн бийстӧн даалгъсн кӱӱндвр кедг сунъгъгин уча-сткиг эвдрлтӧн угагъар хойр джилин туршарт сӧӧнӧр хӧ-лӧджӧцхӧнӧ.

8-ч линейн участкин ахлач М. А. Кукс, Элстин радиоузе-лин техникӱд А. Д. Сеницын, Н. С. Соболев, В. В. Киктенко сӧӧнӧр кӧдлснӧ учрар, сунъ-гъгар кӱӱндлгън, радион келлгън чигн сӧн болв.

Мана рационализатормуд Росецкий, Жигульский болн Стрючкогъин нилчӧр кесг зун минъгън арслнъ мӧнъгн ӧрвлгдв.

Кӧдлмшин нӱурт йовх ӧмтс олн.

Болв мана танъгъчин сунъ-гъгин, бичгин залгълдана кӧ-длмшиг бӱкднъ авад хӧлӧх-лӧ зӧвӧр ик дуту-дундс бӧӧнӧ. Энӱнӧ тускар ӧмтнӧс сонъсхврмуд ордж ирӧд бӧӧнӧ.

Мана сунъгъгин, бичгин залгълданд поштин кӧдлмш—эрки тӧр, тер бийнъ мана танъгъчин эзджӧх газр дегд ӧргн болсн учрар, 300—400 км. хаалгъар кӱтц машин-кӧл-гн угагъар пошт зӧӧлгън—ик кӱчр кӱнд болджана.

Хальмг танъгъчар долан хонгт зургъа дакдж пошт зӧӧхд 78 автомашин кергтӧ. Манд болхла 32 машин тоо-та бӧӧнӧ, теднӧс 10—12 машинь оньдинд яслгънд бӧӧнӧ.

Шин бӱрдсн райодар пошт бӧӧх гермӱд дегд му бӧӧдлд бӧӧнӧ. Элст балгъсна поштин гер чигн сӧн биш, кесг джи-лӧс нааран ясгдӧд уга бӧӧдж. Сунъгъгар кӱӱндхӧр, бичг тӧвхӧр ирсн ӧмтст кергтӧ тоот бичх, кӱӱндх, суух бӧӧ-рн уга.

Танъгъчин хотл балгъснд, селӧдӧр бичг тӧвдг яршгуд чигн кӱтц уга. Цуг эн тоот тату-тартгиг бӧӧрн газрин гардачнр, крайин связин уп-равлень медцхӧсн бийснъ, дӧнъ-нӧкд болхар седхш.

1957 джилин февралин 22-т гарсн РСФСР-н Министрмӱ-дин Советин „Хальмг танъгъ-чд дӧнъ-нӧкд болхин туск“ тогтавриг РСФСР-н Связин Министерств болн крайин связин управлень кӱцӧджӧц-хӧхш. Эн джил манд ӧгх 5 герин гурвинъ ӧгв, 30 автома-ши ӧгхӧсн 16 маши ӧгв. Эл-стин кӱч-кӧлсчирин депутат-рин Совет, автотракторсбы-тин эзджӧсн 1 ериг манд ӧгх болдж шиидвр гаргъла, болв тер шиидвр ода кӱртл кӱцӧг-дӧд уга.

Шин бӧргдджӧх гермӱд но-мер уга болсар, ирсн бичг, сунъгъг зӧӧдг ӧмтсд ик кӱчр болджана, зӧрмдӧн газет, журналмудиг цагланъ кӱргдж ӧгч болхш.

Райцентрмӱд Элстлӧ му залгъата болсн учрар, теднӧ хоорнд кӱӱндӧн дегд зовлнъ-гта болна. Дакад болхла ра-диоузлин кӧдлмш муугъар кеглджӧнӧ, совхозин гардачнр болн совхозмудин управлень эн кӧдлмшиг ясрулх эв-аргъ хӧӧджӧхш.

Эн тоот деер келгдсн тату-тартгиг ӧбрхн цагин эргцд чиклдгин аргъ хӧӧх кергтӧ.

Мана сунъгъгин, бичгин залгълдана кӧдлмшчнр Алдр Октябрин 40-ч ӧбнд нерӧддж авсн социалистическ дӧрлдӧнӧ даалгъвран сӧӧнӧр, цагланъ кӱцӧхӧр зӱткджӧцхӧнӧ.

ДЖАМБИ НОВ ДОРДЖ.
Хальмг танъгъчин связин
управле нӧ начальник.